

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 St 1065763 23 St
Sarajevo, 19.07.2024. godine

Općinski sud u Sarajevu, stečajni sudija Sedina Duraković, u stečajnom postupku nad imovinom stečajnog dužnika KARDEX d.o.o. Sarajevo, ulica Kasima Prohića broj 1, Sarajevo, van ročišta dana 19.07.2024. godine, donio je slijedeće:

R J E Š E N J E

OTVARA SE stečajni postupak nad imovinom stečajnog dužnika KARDEX d.o.o. Sarajevo, ulica Kasima Prohića broj 1, Sarajevo, koji se neće provoditi zbog nedostatka stečajne mase za pokriće troškova stečajnog postupka, pa se ovaj postupak stečaja i ZAKLJUČUJE.

Za stečajnog upravnika se imenuje Boloban Mehmed iz Sarajeva, ul. Braće Begić 40.

Po pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Sarajevu, radi brisanja stečajnog dužnika iz sudskog registra MBS broj 1-22385.

Troškovi stečajnog postupka padaju na teret stečajnog dužnika.

Ovo Rješenje će se objaviti u "Službenim novinama FBiH", na oglasnoj tabli suda, web stranici suda-elektronskoj tabli suda i na internet stranici FIA-e.

O b r a z l o ž e n j e

Rješenjem ovoga suda broj gornji od 13.03.2024. godine pokrenut je prethodni postupak radi utvrđivanja uslova za otvaranje stečajnog postupka nad imovinom privrednog društva KARDEX d.o.o. Sarajevo, ulica Kasima Prohića broj 1, Sarajevo, te je za privremenog stečajnog upravnika imenovan Boloban Mehmed iz Sarajeva, ul. Braće Begić 40.

Oglas o pokretanju prethodnog postupka i imenovanju Boloban Mehmeda za privremenog stečajnog upravnika objavljen je u Službenim novinama FBiH broj 25 od 03.04.2024. godine i izvršeno javno oglašavanje putem oglasne table suda.

U prethodnom postupku privremeni stečajni upravnik je dana 19.04.2024. godine dostavio izvještaj u kojem je, pored ostalog, naveo da postoje zakonski razlozi za otvaranje stečajnog postupka nad privrednim društvom KARDEX d.o.o. Sarajevo, ulica Kasima Prohića broj 1, Sarajevo ali da dužnik nema imovine koja bi činila stečajnu masu, a što je ponovio i na ročištu za ispitivanje uslova za otvaranje stečajnog postupka dana 14.05.2024. godine.

Cijeneći Izvještaj privremenog stečajnog upravnika, Javnim pozivom od 16.05.2024. godine („Službene novine FBiH“ broj 36 od 17.05.2024. godine) pozvani su povjerioci i zainteresovana lica da u roku od 30 (trideset) dana od dana objavljivanja ovog poziva

predlože otvaranje stečajnog postupka nad imovinom stečajnog dužnika KARDEX d.o.o. Sarajevo, ulica Kasima Prohića broj 1, Sarajevo uz uplatu predujma za obezbjeđenje troškova stečajnog postupka u iznosu od 3.500,00 KM na depozitni račun ovog suda broj 1411965320009639 otvoren kod BBI Banke, da ukoliko u ostavljenom roku niko od pozvanih ne predloži otvaranje stečajnog postupka i ne uplati određeni predujam, sud će donijeti Rješenje o otvaranju i zaključenju stečajnog postupka, te da ako zainteresovana lica predlože otvaranje stečajnog postupka i uplate određeni predujam u navedenom roku, sud će otvoriti stečajni postupak i voditi ga u skladu sa odredbama Zakona o stečaju. Isti je objavljen u Službenim novinama FBiH broj 36 od 17.05.2024. godine i izvršeno javno oglašavanje putem oglasne table suda i web stranice suda-elektronske table suda.

U ostavljenom roku a ni do dana donošenja ovog Rješenja nije dostavljen dokaz o uplati navedenog iznosa, niti je dostavljen podnesak kojim je neko od povjerilaca ili zainteresovanih lica obavjestio sud da će uplatiti traženi iznos predujma. Odredbom člana 115. Zakona o stečaju je propisano da stečajni povjerioci mogu svoja potraživanja prema stečajnom dužniku ostvarivati samo u stečajnom postupku.

Na osnovu Izvještaja privremenog stečajnog upravnika utvrđeno je da stečajni dužnik duži vremenski period nije imao poslovnih aktivnosti, da su računi blokirani, da stečajni dužnik nije bio u stanju izmirivati svoje obaveze po osnovu poreza i doprinosa te da nema imovine iz čije bi se prodaje mogli pokriti troškovi stečajnog postupka tj. nema stečajne mase.

Po Javnom pozivu od 16.05.2024. godine niko od pozvanih/zainteresovanih lica nije predložio otvaranje stečajnog postupka niti dostavio dokaz o uplati traženog predujma za pokriće troškova stečajnog postupka, pa obzirom da nema stečajne mase za pokriće troškova stečajnog postupka, niti je iskazana volja za predlaganje otvaranja stečajnog postupka a time ni predujmljivanje sredstava za pokriće troškova postupka, to sud nije ni provodio stečajni postupak, tj. otvorio je isti i isti odmah zaključio, shodno odredbi člana 102. stav 8. Zakona o stečaju.

Odluka o objavljivanju otvaranja i zaključenja stečajnog postupka donesena je na osnovu odredbi člana 102. stav 8. i 107. Zakona o stečaju.

Odluka o brisanju pravnog lica iz sudskog registra donesena je na osnovu odredbi člana 108. stav 1. tačka b). Zakona o stečaju.

STEČAJNI SUDIJA
Sedina Duraković

Pouka o pravnom lijeku:

Protiv ovog rješenja dozvoljena je žalba. Žalba se podnosi Kantonalnom sudu u Sarajevu putem ovog suda u 3 (tri) primjerka, u roku od 8 dana po proteku 5 dana od objave rješenja u „Službenim novinama FBiH“.